

րէն. երթալով կը բազմապատկի նոցա դիմաց հե-
ռաւոր Տաւրիոյ գեղեցկութիւնը, կը հալի նոցա
սիրտը երբ կը յիշեն որ անդարձ պիտի լինի ի-
րենց պանդխտութիւնն, « ո՛վ յիշատակ աղետաւոր
և քաղցրիկ »: Կը նշուին այն ժամը՝ յորում թո-
ղին զՂրիմ, կ'երդնուն որ անպատճառ վերա-
դառնան ու վայելեն իրենց պապենական այգի-
ներն ու պարտէզները. կը բողոքեն կը պաղատին,
այլ լսող չի լինիր: Քանի մի գերդաստանք ինչպէս
Տէօլվէթեանքը կ'անցնին յԵկատերինեւլաւ իրենց
կաթուղիկ եղբարց մօտ, և ապա նոցա հետ 'ի միա-
սին կը վերադառնան 'ի Ղրիմ. այլք ոմանք գի-
շերախառն կ'ուզեն վերադառնալ փախչելով, այլ
նոցա առաջ պատ կ'եննեն Խաղախաց սուինք: Կա-
մայ և ականայ կը խոնարհին առ ժամն ճակա-
տագրին անողոք օրինաց: Յովսէփ սրբազան՝ նո-
ցա թեմակալ առաջնորդը շատ յորդոր և խրատ-
ներ կու տայ, որ Ողորմած կայսրուհւոյն կամացը
հնազանդին. մեծահանգէս կ'օրհնէ ըստ զծա-
գրեալ յատակաձևոյն նոր շինուելիք քաղաքին հի-
մունքը, և հին՝ միանգամայն ցանկալի անուամբ
կը կնքէ քաղաքը Նախիջևան կոչելով: Այս կը լինի
1779 ին, Ղրիմէ ելնելուն երկրորդ տարին. կ'անցնին
ամիսներ, կ'անցնին տարիներ, տապա-
կէզ ամարանց՝ խստաշունչ ձմեռներ կը յաջորդեն,
կու գայ գարուն. կը յիշեն գեղացիք իրինց Ղրի-
մեցի համանուն ¹ գեղերն անտառազարդ բլուր-

¹ Նախիջևանցի գեղացիք իրենց գեղերուն թաթարա-
հնչիւն անուններ տուած են, 'ի յիշատակ իրենց հին բնա-
կութեան Չալթըր (Օրդալան), Մեծ Սալա, Սուտան - Սա-
լա, Թոփաի և Նիսվիթա. այս վերջինս թաթարահնչիւն
չէ, և Ղրիմու մէջ լսած եմ մինչև ցայսօր այդ անունով գեղ: